

खबरां

- प्रधानमंत्री नरेंद्र मोदी होरें असम च 6 ज्हार 950 करोड़ रपे थमां मती दी काजीरंगा एलिवेटेड कारिडोर परियोजना दा नीहू पत्थर रक्खेआ। उनें आखेआ जे काजीरंगा छड़ा राश्ट्री उद्यान गै नेई ऐ सगुआं एहू असम दी आत्मा ऐ।
- प्रधानमंत्री मोदी होरें 2 नमीं अमृत भारत एक्सप्रेस रेलें दी झंडी दस्सिए रवाना कीता।
- प्रधानमंत्री नरेंद्र मोदी होरें पच्छिम बंगाल च 830 करोड़ रपे थमां मती दी केई विकास परियोजनाएं दा उद्घाटन कीता ते केइएं दा नीहू पत्थर रक्खेआ।
- भलेआं लौहके, लौहके ते दरमयाने दर्जे दे उद्योगें सरबंधी मंत्री जीतन राम मांझी होरें अज्ज नमीं दिल्ली च पी.एम विश्वकर्मा हाट-2026 दा उद्घाटन कीता।
- भारत नै बरें 2024-25 च बिजली दी बंड सरबंधी 2 ज्हार 701 करोड़ रपे दा मुनाफा दर्ज कीता ऐ।
- नासा नै अपने शक्तिशाली नमें चंद्रमा राकेट गी लांच पैड तगर पजाई दिता ऐ। एहूदे कन्नै गै 50 थमां मते बरें मगरा मानव युक्त चंद्रमा फलाई अराउंड मिशन दी त्त्यारी तेज होई गेई ऐ।

<><><><><>

PM-Assam

प्रधानमंत्री नरेंद्र मोदी असम दे नागांव जिले दे कलियाबोर च 6 ज्हार 950 करोड़ रपे थमां मती दी काजीरंगा एलिवेटेड कारिडोर परियोजना दा नीहू पत्थर रक्खेआ। राश्ट्री जरनैली शिड़क दे तैहत करीब 86 किलोमीटर लम्मी एहू कारिडोर परियोजना पर्यावरण दे अनुकूल ऐ। एहूदा 35 किलोमीटर हिस्सा ऐलिवेटेड वाइल्ड लाइफ कारिडोर दा होग जेडा काजीरंगा राश्ट्री उद्यान थमां लंगगोग। इस परियोजना दा मकसद क्षेत्रीय राबते च सुधार करदे होई उद्यान दी समृद्ध जैव बन सबन्नता दा संरक्षण यकीनी करना ऐ। एहू परियोजना नागांव, कार्बी, आंगलोग ते गोलाघाट जिले थमां लंगघोग ते इसी डिब्रगढ ते तिनसुकिया सने असम च कनेक्टिविटी च सुधार होग। ऐलिवेटेड वाइल्ड लाइफ कारिडोर थमां वन्य जीवें दी आवाजाई विजन रूकावट रौहग ते मनुक्खें ते जंगली जानवरें बश्कार संघर्ष घट्ट होग। प्रधानमंत्री होरें कलियाबोर च विकास कम्में दी शुरूआत करदे होई आखेआ जे काजीरंगा छड़ा राश्ट्री उद्यान गै नेई, सगुआं एहू असम दी आत्मा ऐ। उनें आखेआ जे यूनेस्को नै काजीरंगा गी विश्व धरोहर थाहर दे तौर पर मान्यता दिती ऐ। मोदी होरें आखेआ जे हाल दे बरे च काजीरंगा च सैलानिएं दी गिनतरी च बदादा होआ ऐ। उनें आखेआ जे काजीरंगा ते ओदे जंगली जानवरें दी राखी करना छड़ा पर्यावरण संरक्षण गै नेई सगुआं असम दे भविक्ख ते औने आहली पीढिएं प्रति इक जिम्मेदारी बी ऐ। प्रधानमंत्री होरें आखेआ जे असम च भाजपा सरकार जिस चाल्ली कन्नै घुसपैठ दी समस्या कन्नै निब्बड़ा'रदी ऐ, जंगलें दा संरक्षण करा'रदी ऐ, धार्मिक सांस्कृतिक ते ऐतिहासिक थाहरें दी राखी करारदी ऐ ओदी व्यापक तौर पर सराहना कीती जा'रदी ऐ। प्रधानमंत्री

होरें आखेआ जे पिछले इक दहाके च मुलखै च जंगलें ते बूहटें दा आवरण बदेआ ऐ। उनें आखेआ जे एक पेड़ मां के नाम अभियान दे तैहत अजें तगर 26 करोड़ थमां मते बूहटें लाए जाई चुके दे न। प्रधानमंत्री होरें आखेआ जे भारत दुनिया गी दस्सा'रदा ऐ जे कुदरत ते विकास कियां किट्टे अगगे बदी सकदे न।

<><><><><><>

PM Devk Projects

प्रधानमंत्री नरेंद्र मोदी होरें अज्ज पच्छिम बंगाल च 830 करोड़ रपे थमां मती दी केई विकास परियोजनाएं दा उद्घाटन कीता ते केइएं दा नीहू पत्थर रक्खेआ। उनें कोलकाता गी मुख्य दे होरनें हिस्सें सोयां जुड़ने आहली 3 अमृत भारत रेल गड्डिएं गी रवाना कीता। इस मौके पर जनस्ीा गी संबोधित करदे होई प्रधानमंत्री होरें आखेआ जे सारी केंद्री परियोजना पच्छिम बंगाल दे विकास गी गति प्रदान करोग। उनें इस गल्ला पर जोर दिता जे विकसित भारत दे निर्माण आस्तै पूर्वोत्तर भारत दा विकास लाजमी ऐ। इस लक्ष्य गी पूरा करने आस्तै केंद्र सरकार जत्त करारदी ऐ। मोदी होरें आखेआ जे एहू कार्यक्रम इस संकल्प गी होर मजबूत करदा ऐ। प्रधानमंत्री होरें आखेआ जे पिछले 24 घंटे पच्छिम बंगाल दे रेल संपर्क आस्तै बड़े महत्वपूर्ण रए न। मोदी होरें आखेआ जे बंगाल च जल मार्गें दी अपार संभावना ऐ ते केंद्र सरकार एहूदे पर बी कम्म करा'रदी ऐ। उनें आखेआ जे इनें परियोजनाएं कन्नै पच्छिम बंगाल गी विनिर्माण, बपार ते रसद दे इक प्रमुख केंद्र दे तौर पर विकसित कीता जाई सकदा ऐ। प्रधानमंत्री होरें बालागढ़ च विस्तारित बंदरगाह द्वार प्रणाली दा बी नीहू पत्थर रक्खेआ।

<><><><><><>

MH.CM

महाराष्ट्र दे मुखमंत्री देवेन्द्र फडणवीस विश्व आर्थिक मंच 2026 सम्मेलन च हिस्सा लैने आस्तै स्विट्जरलैंड दे दावोस आस्तै रवाना होई गए न। मुखमंत्री हुं'दे कन्नै उद्योग मंत्री उदय सामंत ते वरिष्ठ सरकारी अधिकारी बी सम्मेलन आस्तै रवाना होए न। सम्मेलन दरान महाराष्ट्र दा प्रतिनिधिमंडल वैश्विक उद्योग नेताएं, निवेशकें ते नीति निर्धारकें कन्नै मिलोग। प्रतिनिधिमंडल राज्य च विदेशी प्रतक्ख निवेश, उद्योग परियोजनाएं, रोजगार पैदा करने ते आर्थिक विकास गी बढ़ावा देग।

<><><><><><>

DGCA

नागरिक उड्डयन महानिदेशालय डी.जी.सी.ए नै इंडिगो पर 22 करोड़ 20 लक्ख रपे दा जुर्माना लाया ऐ। एहू जुर्माना पिछले बरे दिसंबर दी शुरूआत च इंडिगो आसेआ बड़े पैमाने पर डोआरिएं च चिर करने ते उनेंगी रद्द करने सरबंधी मामले च लाया गेआ ऐं 3 थमां 5 दिसंबर बश्कार 2 ज्हार 507 डोआरियां रद्द होने ते इक ज्हार 852 डोआरियां चिरें चलने करी बक्ख-बक्ख हवाई अड्डें पर त्रै लक्ख यात्रिएं गी असुविधा होई ही। इंडिगो दे परिचालन च व्यवधान करी व्यापक समीक्षा ते मूल्यांकन करने आस्तै महानिदेशालय आसेआ कायम 4 सदस्यीय समिति आसेआ कीती गेदी व्यापक जांच मगरा एहू जुर्माना लाया गेआ ऐ। नागरिक उड्डयन दे केई नियमें दी उल्लंघना आस्तै इक करोड़ 80 लक्ख रपे दा जक मुश्त प्रणालीगत जुर्माना ते पिछले बरे 5 दिसंबर सोयां औंदी 10 फरवरी तगर 68 दिनें आस्तै 30 लक्ख रपे दा रोजाना जुर्माना शामिल ऐ।

<><><><><><>

NTA-Admit Card

राश्ट्री परीक्षा एजेंसी एन.टी.ए नै जे.ई.ई मेन 2026 सत्र-1 म्तेयान आस्तै एडमिट कार्ड जारी करी दित्ते ना। बी.ई या बी.टेक दे पेपर सत्र लेई 21 सोयां 24 जनवरी तगर होने म्तेयान आस्तै मेदवार एन.टी.ए दी अधिकारिक वेबसाइट jeemain.nta.nic.in थमां अपना एडमिट कार्ड डाउनलोड करी सकदे ना।

<><><><><><>

PM Vishwakarma Haat

लौहके, भलेआं लौहके ते दरम्याने दर्जे दे उद्योगें दे मंत्री जीतन राम मांझी होरें अजज नमीं दिल्ली च पी.एम विश्वकर्मा हाट 2026 दा उद्घाटन करदे होई एम.एस.एम.ई गी मुल्ख दे विकास दी रीड दस्सेआ। उनें आखेआ जे एह आयोजन शिल्पकारें गी उन्दे उत्पादें दी ब्रांडिंग ते मार्केटिंग दा मंच उपलब्ध करोआगा। मांझी होरें पी.एम विश्वकर्मा योजना दा जिक्र करदे होई आखेआ जे एह योजना मुल्खे च बेरोजगारी खत्म करने दा जरिया बनोग। उनें इस आयोजन च हिस्सा लैने आस्तै शिल्पकारें दी सराहना कीती। राज्यमंत्री शोभा करंदलाजे होरें आखेआ जे शिल्पकारें गी तकनीकी सहायता सिखलाई ते बजार तगर पुज्ज उपलब्ध करा'रदी ऐ।

<><><><><><>

Maharashtra Accident

महाराश्ट्र च सोलापुर-पुणे राश्ट्री जरनैली शिडक पर मोहोल कश इक शिडक हादसे च 5 लोकें दी मौत होई गई ते इक महिला घायल होई गई। घायल महिला गी मोहोल दे सरकारी अस्पताल च भर्ती कराया गेआ ऐ। हादसा कल चिरे राती होआ जिसले तेज रफ्तार कार बेकाबू होई शिडक दे कंडे इक बूटे कन्नै टकराई गई। एह लोक धार्मिक यात्रा मगरा पनवेल थमां अक्कल कोट जा'रदे हे।

<><><><><><>

US Taffir EU

यूरोपीय संघ दे नेताएं अमरीकी राश्ट्रपति डोनल्ड ट्रम्प हुंदे ग्रीनलैंड पर कब्जे ते शुल्क दी धमकिएं दा बरोध कीता ऐ। यूरोपीय संसद दी अध्यक्ष रॉबर्टा मेटसोला होरें आखेआ जे यूरोपीय संघ डेनमार्क ते ग्रीनलैंड दा समर्थन करदा ऐ। उनें आखेआ ऐ जे द्वीप दी सम्प्रभुता पर टैरिफ शुल्क लाने करी कोई असर नेई पौगा। ट्रम्प नै पैहली फरवरी सोयां डेनमार्क, नार्वे, स्वीडन, फ्रांस, जर्मनी, ब्रिटेन, नीदरलैंड ते फिनलैंड सोयां औने आले समानै पर 10 फीसद शुल्क दी घोशणा कीती ऐ जिसी मगरा 25 फीसद तगर बदाया जाई सकदा ऐ।

<><><><><><>

US Tarrif

यूरोपीय नेताएं अमरीकी राश्ट्रपति डोनल्ड ट्रम्प हुंदे प्रस्तावित शुल्क दी निंदेआ कीती ऐ। इक सांझे बयाने च यूरोपीय परिशद दे अध्यक्ष एंटोनियो कोस्ता ते यूरोपीय आयोग दी अध्यक्ष उर्सुला वॉन डेर होरें आखेआ ऐ जे एह गैऽ सरबंधें गी कमजोर करी सकदी ऐ ते इक खरतनाक प्रक्रिया पैदा करी सकदी

ऐ। उनें भौगोलिक अखंडता ते सम्प्रभुता गी अंतरराश्ट्री कनून दा बुनियादी सिद्धांत दस्सेआ। होर दुए यूरोपीय नेताएं बी इस गैंड दी निंदेआ कीती।

<><><><><><>

Purohit Dies

भारती जनता पार्टी दे वरिष्ठ नेता ते महाराश्ट्र दे साबका मंत्री राज के. पुरोहित हुंदा कल मुम्बई च काल होई गेआ। ओहू 71एं बरें दे हे ते लम्में चिरें थमां बमार चला'रदे हे। पुरोहित हुंदी मुम्बई च भारती जनता पार्टी च अहम भूमिका मन्त्री जंदी हीं विधानसभा च भाजपा दे मुख् साचेतक रेय ते उत्तर भारतीय समुदायें दी अवाज चुक्कने आस्तै जाने जंदी हे।

<><><><><><>

Jaishankar US Senator

विदेश मंत्री डॉ. एस जयशंकर होरें अज्ज नमीं दिल्ली च अमरीका दे सीनेटर स्टीव डेंस हुंदे कन्नै बैठक कीती। सोशल मीडिया दी इक पोस्ट च डॉ. जयशंकर होरें आखेआ जे बैठक च दौनें पखें दपक्खी सरबंधें ते रणनीतिक महत्व पर व्यापक ते खुल्ली चर्चा कीती।

<><><><><><>

UP-FIR

उत्तर प्रदेश पुलस नै वाराणसी दे मणिकर्णिका घाट पुन-निर्माण कम्मै कन्नै सरबंधत सोशल मीडिया पर गलत ते भ्रामक सामग्री प्रसारित करने दे आरोप च कल संझा 8 एफ.आई.आर दर्ज कीतियां गेइयां। एहू मामले शैहर दे चौक पुलस स्टेशन च दर्ज कीते गए। इन्दे च हिंदू देवी देवताएं दिएं छविएं दा इस्तेमाल, हिंदू धर्म च आस्था रखने आहले लोकें गी गुमराह करने लेई लोकें गी भडकाने ते निर्माण एजेंसी दे कन्नोकन्नी सरकार दी छवि खराब करने जनेहू आरोप शामिल ना। मणिकर्णिका घाट पर बुनियादी स्थूलतें गी मजबूत करने ते उसी शैल सनाकड़ा बनाने दा कम्म करा'रदी निर्माण एजेंसी नै पुलस गी शकैत दर्ज कीती ही। हालांकि अजें तगर कोई गिरफ्तारी नेई कीती गेई ऐ।

<><><><><><>

Power Utilities

बिजली दी बंड सरबंधी कंपनिएं बरे 2024725 च 2 ज्हार 701 करोड़ रपे दा Profit after tax PAT दर्ज कीता ऐ। बिजली मंत्रालय मूजब राज्य विधुत बोर्ड दे विखंडन ते निगमीकरण मगरा पिछले केई बरें थमां बंड सरबंधी कंपनियां समग्र तौर पर PAT गी लेइयै घाटे दी स्थिति च ही। मंत्रालय नै आखेआ ऐ जे ब'रे 2024-25 दा एहू सकारात्मक PAT बरे 2013-14 च होए दे 67 ज्हार 962 करोड़ रपे दे घाटे दी तुलना च इक महत्वपूर्ण सुधार ऐ। एहदे पर टिप्पणी करदे होई केंद्री उर्जा मंत्री मनोहर लाल होरें आखेआ जे एहू बंड क्षेत्र आस्तै इक नमा ध्याय ऐ ते बंड क्षेत्र दिएं समस्याएं गी दूर करने आस्तै पुट्टी गेदी गैं दा नतीजा ऐ।

<><><><><><>

Bangladesh H.R

बांग्लादेश च 12 फरवरी गी आम चुनांस कराए जाने ना चुनांस थमां पैहले उत्थे महिलाएं-कुड़िएं ते धार्मिक अल्पसंख्यकें खिलाफ हिंसा दी घटनाएं च बाद् दिक्खेआ जा'रदा ऐ। मानवाधिकार निगरान समूह एच.आर.डब्ल्यू नै इक रिपोर्ट च अंतरिम सरकार दी मौलिक मानवाधिकारें दी राखी करने च विफलता गी उजागर कीता ऐ। एच.आर.डब्ल्यू नै सरकार सोयां महिलाएं दी अगुवाई बदाने, अंतरराष्ट्री संधिएं दा पालन करने ते अल्पसंख्यकें लेई संवैधानिक सुरक्षा सिफारिशें गी लागू करने दा आग्रह कीता ऐ।

<><><><><><>

NASA

नासा नै अपने शक्तिशाली नमें चंद्रमा रॉकेट गी लांच पैड तगर पजाई दिता ऐ। एहदे कन्नै गै 50 थमां मते बरें मगरा मानवयुक्त चंद्रमा फलाई अराउंड मिशन दी तयारियां तेज होई गई ऐ। 322 फुट उच्चा स्पेस लांच सिस्टम-एसएलएस राकेट फ्लोरिडा स्थिति कैनेडी अंतरिक्ष केंद्र सोयां लांच पैड तगर लेई जाया गेआ। इस अभियान दे तैहत 4 अंतरिक्ष यात्री चंद्रमा दी परिक्रमा करिए करीब 10 दिनें दी यात्रा मगरा धरती पर परतोडना। इस मिशन दी शुरूआत मेद ऐ जे फरवरी दे शुरू च होई सकदी ऐ। अंतरिक्ष यात्रिएं दे दल च नासा दे त्रै अंतरिक्ष यात्री रीड वाइजमैन विक्टर ग्लोवर ते क्रिस्टीना कोच ते कनाडा दा इक अंतरिक्ष यात्री जेरेमी हैन शामिल ऐ।

<><><><><><>

US-Army

अमरीकी सेना नै सीरिया च जवाबी कार्रवाई करदे होई हवाई हमले कीते ना। इनें हमलें च अलकायदा कन्नै जुडे दा इक आतंकवादी नेता मारेआ गेआ ऐ। अमरीकी सेंट्रल कमान सेंट कॉम मूजब एह हवाई हमला उत्तर पच्छमी सीरिया च कीता गेआ। एहदे च गनमैन बिलाल हसन अल जसीम गी निशाना बनाया गेआ हा, जेडा 13 दिसंबर गी पाल मायरा च होए दे आई.एस.आई.एस दे हमले शामिल हे। इनें हमले च 2 अमरीकी सैनिकें सने इक अमरीकी नागरिक दी मौत होई गई ही। सेंट कॉम दे कमांडर एडमिरल ब्रैड कूपर होरें आखेआ जे एह कार्रवाई इस गल्ला दी सारत ऐ जे अमरीका अपने सैनिकें ते नागरिकें पर हमला करने आहलें गी नेई छोड़दा।

<><><><><><>

IMD

मौसम विभाग नै कल्लै तगर दिल्ली, पंजाब, हरियाणा ते उत्तर प्रदेश च बडुलै ते रातीं बेल्लै घना कोहरा छाए रौहने दी पेशगोई कीती ऐ। विभाग नै आखेआ ऐ जे अज्ज पूर्वी मध्य प्रदेश, छत्तीसगढ, ओडिशा ते पूर्वी उत्तर प्रदेश दे किश हिस्सें च सीत लैहर चलने दी मेद ऐ। विभाग नै अगले दो दिनें च उत्तर पच्छिम ते मध्य भारत च घटोघट तापमान 2 डिग्री सेल्यिस बदने दी मेद दस्सी ऐ। इस दरान मुख्य दे केई हिस्सें च घने कोहरे करी रेल दी आवाजाई बाधित होई ऐ। दिल्ली जाने आली 50 थमां मती रेल गड्डियां चिरें चला'रदियां ना।



Weather

मौसम विभाग नै औने आहले दिनें दरान जम्मू-कश्मीर च बरखा ते बर्फबारी दे असार जताए ना। विभाग मूजब, कल्लै थमां प्रदेश दे मते सारे इलाकें च मौसम बदलोखड़ा बने दा रौहग ते केई थाहें पर हौली शा दरम्याने दर्जे दी बरखा जां बर्फबारी होई सकदी ऐ। उ'आं 22 जनवरी थमां लेइयै 25 जनवरी तगर खित्ते च पच्छमी ब्हाएं च खौदल करी मौसम प्रभावत रेई सकदा ऐ। तोंआई 23 ते 24 जनवरी गी चिनाब घाटी, उधमपुर, रियासी ते दक्खनी कश्मीर दे किश हिस्सें च मध्यम शा भारी बरखा बरने दे असार दस्से गेदे ना। मौसम विभाग ने जात्तरिएं ते करसानें गी लोडचदी एहतियात बरतने लेई आखेआ ऐ।



Encounter Kishtwar

किश्तवाड़ जिले दे दूर-दरेडे जंगली इलाके च सुरक्षाबलें ते आतंकवादियें बश्कार टाकरा भखी पेआ। आकाशवाणी जम्मू संवाददाता नै जानकारी दिती ऐ जे अधिकारियें दा आखना ऐ जे छातरू इलाके च मंद्राल-सिंहपोरा कश सोनर ग्रांS च घेराबंदी ते तपाशी अभियान दरान दिन बेल्लै गोलीबारी शुरू होई। एहदे चलदे बादू नफरी गी उत्थे भेजी दिता गेआ ऐ। खीरी रिपोर्ट थ्होने तगर गोलीबारी जारी ही। होर ब्यौरे गी अजें बलगेआ जा'रदा ऐ।



VPN Ban Violation

उधमपुर जिले च सुरक्षा कारणें करी मोबाइल फोनें च वी.पी.एन सेवाएं दे इस्तेमाल पर बंदिश आहले हुक्म दी कथित तौरा पर पालमा नेई करने लेई इक्क महिला दे खलाफ मामला दर्ज कीता गेआ ऐ। जिले च वी.पी.एन सेवाएं दे इस्तेमाल पर बंदिश लेई जंदी त्रै जनवरी गी जिला मैजिस्ट्रेट हुं'दे आसेआ जारी हुक्मै दी कथित तौरा पर उल्लघना लेई मजालते आहले थाने च भारती न्याऽ संहिता दिएं सरबंधत दफाएं तैहत मीना शर्मा नांS दी इस महिला दे खलाफ मामला दर्ज कीता गेआ ऐ। एह महिला मजालता च पलनू ग्रांS दी बसनीक ऐ ते ओहदे मोबाइल फोन नंबर पर वी.पी.एन सेवाएं दा इस्तेमाल कीता जा'रदा ऐ। इस मामले दे सरबंधै च जांच जारी ऐ।



US-Ukraine

करीब 4 ब'रे थमां चला'रदे युद्ध गी खत्म करने आस्तै अमरीका दी अगुवाई च राजनैतिक जद्वें पर गल्लबात आस्तै यूक्रेन दा इक प्रतिनिधिमंडल अमरीका पुज्जा ऐ। इस दरान रूस नै इक बारी परतिए यूक्रेन दे बिजली ग्रिड गी निशाना बनाया ऐं इस कड़ाके दी ठंड च बिजली ते हीटिंग बवस्था ठप होई गेई ऐ। राष्ट्रपति ब्लोदिमीर जेलेंस्की होरें आखेआ जे प्रतिनिधिमंडल अमरीका दे अधिकारिएं कन्नै शांति प्रस्ताव पर चर्चा करोग।

